

Reisebericht Musikreise MG Berg – Sonntag, 14. September 2014

Null null, null null isch gsi

und alli no mit debii.

Los goht ez s Fäscht,

mir gönd no lang nöd is Näscht.

In Naters isch es richtig toll,

alli Junge sind fast scho voll.

Aber au di älter Generation loht's krache,

do müemer üs gar kei Sorge mache.

D' Gasterländer gäbed richtig Gas

und mir hend ganz viel Spass.

Am Morge früeh bim Zmorge,

hemmer no es paar Sorge.

Einigi mached en müede Idruck,

doch jetzt chömmer nüme zruck.

Es paar müend sogar s guete Buffet usloh,

wells nonig hend möge ufstoh.

Bevor mir in Car igstige sind, hemmer eis gsunge,

damit au für üsi Geburtstagschind Manuel und Urban de Tag isch glunge.

Churz noch de Abfahrt mit em Car,

schlooft au scho di ganz Schaar.

S schnarchle het me guet ghört,

doch das het niemer wüerkli gstört.

Uf em Grimselpass simmer usgstige
und es Wiili verblibe.

Luzern heisst üse nögst Stopp,
das finded mir alli top.

De Zmittag isch uf em Tisch,
es het geh kei Fisch.

Teigware und feins Fleisch stoht döt,
me cha neh wa me wött.

S Glace isch hart wie Stei,

mir bruched drüü Lüüt zums teile in zwei.

Verwütscht het denn schlussendlich glich jede e Portion,
drum hend mir alli gha Motivation.

Foxtrail isch üses plante Spiel,

D' Besichtigung vo Luzern isch 's Ziel.

Dezue müemer de Spure vom Fuchs noh,
debii dörfemer nie blibe stoh.

De Fuchs isch schlau,

Rätsel löse müemer au.

I acht verschiedene Gruppe,

begebed mir üs je uf e anderi Route.

In Luzern und Umgebig sind mir umeglaufe
und hend üs debi es paar mol verlaufe.

Usser Atem simmer,

hoffetlich wird's nöd schlimmer.

Aber au die mit wenig Chraft,
hends schlussendlich glich no gschafft.
S Foxtrail het üs geh nöd so viel Rueh,
doch jetzt goht's jo au scho wieder hei zue.

Dankbar sind alli de Organisatore,
wo gha hend viel um d' Ohre.
D' Musigreis 2014 isch super gsi,
drum sind mir au im Achtzehni wieder debi.
Mir freued üs scho unglaublich uf nögstmol,
mir sind üs sicher, es wird wieder genau so toll.

S Reime isch jetzt verbii,
üs fällt nämlich nüt meh ii.

Ramona und Sonja